

Morning Regional Dogri News Bulletin, 08th October 2023

मार्निंग डोगरी न्यूज़ बुलेटिन, समें. 09-20 Hrs

<><><><><><>

Headlines

1. उपराज्यपाल मनोज सिन्हा होरें आक्खेआ ऐ जे प्रधानमंत्री नरेन्द्र मोदी हुंदिएं कोश्टें दी बदोलत जम्मू कश्मीर तबाही, बर्बादी ते हिंसा दे दौरे चा बाहर आइयै समाजी आर्थिक विकास दी इक टकोह्दी मसाल बनी गेदा ऐ।
2. केन्द्र सरकार नै बक्खवादी नेता शब्बीर शाह दिएं सम्पतिएं गी जब्त करने दे इख्तोयार जम्मू कश्मीर केन्द्र शासत प्रदेश गी मुंतकिल करी दित्ते न।
3. जम्मू कश्मीर दे बक्ख-बक्ख हिस्से च लोआई गेदी बैंकें लेई विशेष लोक अदालतें च 4 करोड़ 33 लक्ख रपे दे मामले दा नबेड़ा कीता गेआ।
4. "इस बार सौ पार" दे लक्ष्य गी हासल करदे होई भारत नै एशियाई खेड्डें च 107 तगमें हासल कीते। तोआई आईसीसी विश्व कप च ज्ज चिन्नेई च भारत दा मकाबला आस्ट्रेलिया कन्नै होग।

<><><><><><>

LG

उपराज्यपाल मनोज सिन्हा होरें फही दोहराया ऐ जे प्रधानमंत्री नरेन्द्र मोदी हुंदी अगुवाई ते मार्गदर्शन हेठ जम्मू कश्मीर च बड़ा मता समाजिक ते आर्थिक विकास होआ ऐ। उनें दहाके थमां होआ'रदी तबाई, बरबादी आले दौर शा जम्मू कश्मीर गी बाहर कडिडयै इत्थें खुशहाली लेई आंदी ऐ। एह गल्ल उनें Young Presidents Organisation Greater India Chapter दे मिंबरें कन्नै मलाटी करदे होई आक्खी। युवा उद्यमी नेताएं दी सराहना करदे होई उपराज्यपाल होरें आक्खेआ जे मजूदा सरकार नै ऐसा माहौल बनाया ऐ जित्थें लोक अपने स्हाबै अपना जीवन जी सकदे न। कारोबार लेई साजगार माहौल उपलब्ध करोआया गेआ ऐ ते उद्यमिं गी लोड्चदे ते बनकदे मौके दित्ते जा'रदे न तां जे ओह अपने विचारें गी सफल कारोबार च तब्दील करी सकन।

<><><><><><>

Shabir Shah

जेल च बंद बक्खवादी नेता शब्बीर शाह दी अगुवाई आली जम्मू कश्मीर डेमोक्रेटिक फ्रीडम पार्टी पर बैन लाने दे दऊं दिनें मगरा केन्द्री गृह मंत्रालय नै कल शनिवारें गैर कनूनी गतिविधिएं पर रोक लाने सरबंधी कनून तैह्त ओह्दी सम्पतिएं ते फंडस गी जब्त करी सकने दे इख्तेयार जम्मू कश्मीर केन्द्र शासत प्रदेश प्रशासन गी मुंतकिल करी दित्ते न। इस बारे केन्द्री गृह मंत्रालय नै बकायदा इक अधिसूचना जारी कीती ऐ। शब्बीर शाह दे श्रीनगर ते एह्दे आले दुआले दे केई सैलानी थाहरें पर होटल ते होर दुइयां सम्पतियां बी ऐन।

<><><><><><>

Dogra Haat(byte)

जम्मू कश्मीर राष्ट्रीय जरनैली शिड़क पर उधमपुर दे मंथल इलाके च डोगरा हॉट अपने डोगरा खान-पान लेई कस्बे च बड़ा मता मशहूर होई गोआ ऐ। इत्थें कियूर, टोडा, साग, अम्बल, चुल्ले दी रूट्टी बगैरा उपलब्ध ऐ। जम्मू कश्मीर ग्रामीण आजीविका मिशन तैह्त शुरू कीते गेदे डोगरा हॉट च डोगरी खान-पान गी बढ़ावा देने दे अलावा महिलाएं च उद्यमियता गी बढ़ावा थ्होआ'रदा ऐ। एह्दे कन्नै ग्रामीण महिलाएं गी आजीविका कमाने दा मौका थ्होआ'रदा ऐ। आकाशवाणी कन्नै गल्ल करदे होई टिकरी ब्लाक दी ब्लाक विकास कौंसल दियां अध्यक्ष नीशा शर्मा होरें आक्खेआ.....बाईट

<><><><><><>

Butterfly Festival

जम्मू शैहरा दे बाहरले इलाके रैका नरवाल बाई पास स्थित एनवायरमेंट पार्क च कल पैह्ले सलाना तितली उत्सव दा सरिस्ता कीता गोआ। एह्दा मकसद इस इलाके दी सगगोसार जैविक बन-सबन्नता ते इस माहोल च पाए जाने आलिएं बक्ख-बक्ख किस्मे दिएं तितलिएं दे बारे च लोकें गी जानकार बनाना ते उनेंगी दिक्खने दा मौका देना ऐ। इस पैह्ले पैह्ले बटर फ्लाई फैस्टिवल दा सरिस्ता पर्यावरण ते रिमोट सेन्सिंग आस्सेआ कीता गेदा हा जेह्दा उद्घाटन शोरे कश्मीर एग्रील्चर यूनिवर्सिटी स्कास्ट जम्मू दे वाइस चानसलर डॉ. बी.एन.त्रिपाठी होरें कीता। इस उत्सव च 500 कोला मते शिक्षाविदे, विद्यार्थिएं, अध्यापके, विद्वाने, शोधकर्ताएं आइयै तितलिएं दे अनोखे संसार ते जिस माहोल च ओ रौंहदियां न, उंदे बारे च जानकारी हासल कीती। वैज्ञानिक डॉ. माजिद फारुक होरें इस फैस्टिवल दे आयोजन ते तितलिएं दे महत्व पर बी लोह् पाई।

<><><><><><>

CAPD

खुराक नागरिक आपूर्ति ते उपभोक्ता मामलें दी निदेशक रिफ्त कोहली होरें इक मुल्ख इक राशन कार्ड, ई-केवाईसी, मती तरजीह आले कुम्बे गी अन्नदाने उपलब्ध करोआने सरबंधी स्कीम दी स्थिति दा कल जायजा लैता। निदेशक होरें मुत्तलका अफसरें पर इस गल्ला लेई जोर पाया जे ओह आम लोकें च ई-केवाईसी बारे जागरूकता पैदा करन तां जे इसी समें सिर पूरा कीता जाई सकै। इस दरान एह फैसला बी लैता गेआ जे बक्ख-बक्ख स्कीमें बारे जागरूकता शिवर लाए जान ते होर मती जागरूकता पैदा करने लेई सूचनाएं जानकारियें सरबंधी पोस्टर ते पर्चे बी बंछे जान। उनें राशन कार्ड गी इक प्रदेश थमां दुए प्रदेश तोड़ी मुंतकिल करने आले कम्में पर नेडमी तक्क रखने लेई गलाया तां जे हर कुसै गी एहदा लाह हासल होई सकै।

<><><><><><>

Jammu Skill

जिला प्रशासन जम्मू नै हुर विकास सिखलाई सरबंधी मौके उपलब्ध करोआने दा धइयां कीता ऐ जेहदे कन्नै ज्हारां बद्धे नौजवानें गी फायदा हासल होग। एह फैसला जिले च हुनर विकास सरबंधी गतिविधिएं दा जायजा लैने आस्तै जिला विकास आयुक्त सचिन कुमार वैश्य हुंदी अध्यक्षता च बैठक लग्गी। ग्रामीण विकास मैहकमे, प्रधानमंत्री महिला शक्ति केन्द्र, उद्योग सरबंधी मैहकमा, रोजगार ते परामर्श सरबंधी मैहकमा, एसबीआई, हत्थखड्डी, जेकेईडीआई, खाद ग्राम उद्योग बोर्ड, सरकारी पालिटैकनिक ते आईआईटी इदारें दे अफसरें इस बैठक च हिस्सा लैता।

<><><><><><>

CUJ

सैंट्रल यूनिवर्सिटी जम्मू पास्सेआ कल "प्रोत्साहन" विषय तैहत विद्यार्थिं गी उंदी समर्थ ते दिलचस्पी मूजब कम्म ते नौकरी दोआने लेई बक्ख-बक्ख कंपनिं दे नुमांयदे कन्नै मलाटी ते गल्लबात आला इक कार्यक्रम लोआया गेआ। इस मौके कैडिला दे डीजीएम अनुज गुप्ता, मैनेजर प्रोग्राम एंड पालसी राहुल शर्मा ते अप्रतीम मंडाल, हैड बर्जर पेन्टस होरें विद्यार्थिं कन्नै गल्लबात कीती ते उनेंगी प्रोत्साहित कीता। वक्ताएं इस दरान विद्यार्थिं गी हुनर विकास, समर्थ निर्माण, व्यक्तित्व विकास ते अपने आपै गी बेहतर ढंगै नै पेश करने लेई कन्नोकन्नी अपनिं सलाहियतें च बाद्धा करदे रौहने दी सलाह दित्ती तां जे बेहतर करिअर ते बेहतर भविक्ख लेई अपने आपै गी तैआर कीता जाई सकै।

<><><><><><>

Lok Adalat Bank Cases

केन्द्र शासित प्रदेश जम्मू कश्मीर च बँके सरबन्धी मामलें दे नबेड़े लेई खास लोक अदालतें दा सरिस्ता कीता गेआ। इस दरान 4 करोड़ 33 लख रपे दी राशि सरबन्धी 155 मामले नबेड़े गे। इस विशेष लोक अदालत च खास ध्यान बँक मामलें पर दित्ता गेआ। इस दरान बख-बख अदालतें च 886 मामले लैते गे, जिंदे चा 4 करोड़ 32 लख 26 जहार 122 रपे दी राशि सरबन्धी 155 मामलें दा नबेड़ा कीता गेआ। जम्मू कश्मीर कनूनी सेवा प्राधीकरण सरबन्धी मिंबर सैक्रेटरी अमित कुमार गुप्ता होरें जानकारी दित्ती जे अगली विशेष लोक अदालत 18 नवम्बर गी होग जिस दरान उपभोक्ताएं सरबन्धी मामलें दी सुनवाई होग।

<><><><><><>

Millet Samba

मुट्टे अनाज गी बढ़ावा देने बारे प्रधानमंत्री नरेन्द्र मोदी हुंदे आस्सेआ शुरू कीते गेदे अभियान करी सांबा दे करसानें हुन खुश न। की जे उनें गी मक्क, बाजरा, जौ बगैरा थमां पहले मता लाह हासल नेई हुंदा हा। पर हुन एहदे च बेह्तरी होई ऐ। प्रधानमंत्री होरें लोके गी मुट्टा अनाज खाने लेई गलाया जेहदे मगरा सरबन्धी करसानें दी आमदन च बाद्धा होआ। एहदे लेई करसान प्रधानमंत्री हुंदा आभार जताया। इस बारे होर जानकारी साढे संवाददाता सत्तपाल शर्मा थमां.....बाईट

<><><><><><>

Kathua

कठुआ दे जिला विकास कमीशनर राकेश मिन्हास ते कीड़ियां गंडेयाल थमां जिला विकास काउंसल दिएं मिंबर डॉ. श्वेता राजपूत होरें कल 2023 बरे दिएं रबी फसलें दी खुश खरीद लेई करसानें दी सहूलत लेई "भजवाल" थाहर मुंजी दी खरीद लेई इक खुशखरीद केन्द्र दा उदघाटन कीता। इस नमें केन्द्र दे खुल्लने कन्नै कठुआ जिले च इस चाल्ली दी खुशखरीद केन्द्रें दी गिनतरी 11 होई गई ऐ। इस मौके जिला विकास कमीशनर राकेश मिन्हास होरें आखेआ जे भारतीय खाद्य निगम एफसीआई ते प्रदेश अर्जेसिएं, करसानें दी सुविधा ते उंदे फायदे लेई मुंजी दी खुशखरीद दा फैसला लैता ऐ। मुख् राई-बाई अफसर होरें इस मौके आखेआ जे मैहकमे गी मेद ऐ जे ऐकती एह खुशखरीद ढाई लख क्विंटल तगर होई सकदी ऐ।

<><><><><><>

JKAAL Doda

जम्मू कश्मीर कला संस्कृति ते भाषा अकादमी दे डोडा दफतर आस्सेआ शिक्षा मैहकमे दे सैहयोग कन्नै सरकारी हायर सकेँडरी स्कूल च इक सांस्कृतिक कार्यक्रम दा सरिस्ता कीता गेआ.....बाईट

आकाशवाणी संवाददाता नै जानकारी दित्ती ऐ जे विद्यार्थिएं दी शानदार कारकरदगी कन्नै उत्थें मजूद लोक मते मतासर होए ते इस कार्यक्रम दे आयोजन लेई अकादमी दा आभार प्रगट कीता।

<><><><><><>

Asian games

चीन दे हांगझोऊ च होआ करदिएं एशियाई खेड्डें च “इस बार 100 पार” आली वचनबद्धता पर खरा उतरदे होई 107 तगमें हासल कीते न। इंदे च 28 सुन्ने दे, 38 चांदी दे ते 41 कैँह दे तगमें शामिल न। एहदे कन्नै गै भारत नै एशियाई खेड्डें च अपने अभियान गी खत्म करी दित्ता ऐ। 2018 च जर्काता च होई दी एशियाई खेड्डें च भारत नै 70 तगमें जित्तिथै अपना बेहतर प्रदर्शन कीता हा, पर इस बारी भारत नै ओहदे थमां बेहतर प्रदर्शन करदे होई 107 तगमे हासल कीते न। कल भारत नै 12 तगमे हासल कीते। कोड्डी, बैडमिंटन, हॉकी ते तीरअंदाजी च सुन्ने दे तगमे हासल कीते। भारतीय एथलीट ते नशानेबाज एशियाई खेड्डें च छाए दे रेह। एथलैटिक्स च भारत नै 29 तगमें हासल कीते। तोआई क्रिकेट विश्व कप मकाबले च अज्ज भारतीय टीम अपने अभियान दी शुरूआत करोग। एह मैच एम.ए.चिदंबरम स्टेडियम च खेड्डेआ जाग। एहदे थमां पैहले कल खेड्डे गेदे मैच च दक्खन अफ्रीका नै श्रीलंका गी 102 रंजें कन्नै हराई दित्ता। कल खेड्डे गेदे इक होर मैच च बंगलादेश नै अफगानिस्तान गी 6 विकटें कन्ने हराई दित्ता।

<><><><><><>